



Belianet, l'onset que no quereba estar domato

Alberto Gracia Trel

Ilustracions: Chema Lera

Narración: Roberto Serrano

catrinalla

Materials ta aprender aragonés en Educación Infantil

Toz os años malas que plega a primavera tot chira e torna a chirar como si fuese un tierratremo. As flors amanixen, os paixarez cantan e tamién qui millor nunzia que a primavera ye en momentos d'arribar ye o carnaval. Sí, ixa fiesta que toz os años

se gosa fer en os nuestros lugars e en a que gronxiamos asabelo. E, ¿quí no conoix o carnaval de Bielsa? Pos bien, regular que sabrez que uno d'os protagonistas d'iste carnaval ye l'onso. Agora conoixerez a istoria que suzedió arredol d'iste personache e d'ista fiesta.



Tiempo abe, fa ya muitas primaveras, os organizadors ya teneban tot presto e ya eban repartito a os chóvens d'a villa os papels a representar: as trangas, as madamas, os domadors, os onsos, l'amountato e o caballet. E, prou que sí, Cornelio Zorrilla ya teneba a condena denzima d'os suyos uembros e sobre él ya eban recaito toz os mals de l'año.



Cuan ya no quedaba guaire ta o día d'a gran fiesta, os organizadors d'o carnaval tornón a reunir-sen ta deixar tot feito. Manimenos, cuan ya qeran acabando a reunión, uno d'os misaches determinó de contar por si un caso a toz os partizipans. Quitó a man d'a pocha e, fendo-se servir d'os suyos didos, encomenzó a contar punto por agulla a cada uno d'els. E no que remata de fer repaso por toz os protagonistas e faltaba un personache que fese d'onso!!! Malas que i paró cuenta, alertó a toz os de demás e les

ne dizió. A resta, preocupatos de tot, estión pensando firme rato a forma d'apatrusquiar aquel embandullo. ¿Qué podeban fer? Ya no quedaba garra choven que podese fer d'onso porque toz teneban o suyo papel... ¡Yera imposible! Tot continó en cosa dica que, a la fin, os chóvens determinón d'ir a escar a l'atro'l día, antes con antes, a bel onso que ocupase o puesto bueito. Pero prou que sería un onso d'os de verdat.

Alavez, allá en tiempos, os onsos, os de verdat, campaban por toz os cabos. Por un regular yeran onsos –e mesmo onsez– que viviban por Pineta pero tamién gosaban






estar ta par d'Ixavierre, d'Espierba u d'A Espuña. A colla de misaches puyó con a intenzión de trobar-ne beluno e mirón por toz os pratos, montañas e esplucas que podión. No guaire dimpués s'enzertó que amaneixió un onso. O suyo nome era **Belianet** e qera l'onso más pando e de vez más tranquilaz d'o mundo. Día sin atro, o pobrón d'él no feba so que dormir e minchar lamins. En que os misaches lo vidon, **Belianet** fue o trigato ta que fuese paseqato por as carreras d'a villa. Como que qera dormindo, a colla lo ficó en una gabia e lo baixó enta o lugar.

O gran día d'o carnaval arribó. Feba buen orache e un sol bien gran se debuixaba en o zielo de Bielsa. **Belianet**, que eba dormito a garrón caito, fue quitato d'a suya gabia por un misache que, vestido de

domador con una piel de choto en a espalda, levaba en una man un tocho e en l'atra una cadena ta enreliar a l'onso. Diz que ixa cadena les feba onra ta controlar a fuerza d'os plantigraus pero,



manimenos, o pando de **Belianet** no sabía ni qué yera ixo: él solo capiba de dormir e de minchar. Encara que o domador tamién carriaba un morral con minchar e bebida, o pobrón de l'onso no en tastó mica.

A la fin se despertó e en que se vido en ixe ambién, a o tranquilaz de **Belianet** le fizo firme medo tot o que veyeba por os suyos gollez e tot o



que sentiba por as suyas chicotas orellas. Antiparte, ya encomenzaba a tener prou fambre e sete e denguno no le daba cosa. Ixo fue o que, a la fin, empentó a o buenaz de **Belianet** a mirar de trobar una endreza por a que poder esclampar. Dito e feito. En o barafundeo d'a plaza, **Belianet** aproveitó e pretó a fuqir carrera-carrera cara ta o ríu e asinas calmar a sete. Como a plaza yera de bot a bot, denguno no i paró cuenta.



Belianet feba memoria que cuan yera chicot estió en Bielsa e reconoixeba os suyos paisaches. Allí podió a la fin calmar a sete pero a fame le podeba más. Asinas que no en quedó atra: caleba que mirase bella cosa que ficar-se en a boca. No tardó guaire a trobar por meyo d'o suyo gran olfato o que pareixeba minchar. S'amanó ta o puesto d'aon dimanaba ixa ulor cuasi sin ubrir os uellos. **Belianet** se metió en drento d'o que pareixeba un arcón bien gran e minchó tot o que i ensopegó: rai o que fuese. De momento, se fizo a escureldat e **Belianet**, a saber qué sorprendito, no vido más cosa.

Entremistante, en a villa, a fiesta continaba e os chilos de goyo se sentiban por tota a redolada. Denguno no eba parato cuenta en que l'onso, que yera de verdat, ya no yera tafaniando por as plazas e carreras d'o lugar.

En que vido tanta foscor, **Belianet**, como yera de dar, s'eba dormito dimpués de bien farto. Dimpués d'un rato, sintió un fuerte rudio e se despertó. Ubrío os uellos pero no i veyeba res. ¿Qué yera pasando?, se preguntaba. Contino, difuera de l'arcón an que se trobaba l'onso, unas personas parlaban pero as suyas voces poquet a poquet se feban más leixanas. Cuan ya no sintió cosa, **Belianet** fотиó un truco en a parte d'alto de l'arcón e s'ubrió sin garra resistencia. ¡iiiO plantigrau s'eba ficato en un maletero d'una cambioneta!!! ¡E no sabeba án se trobaba! Se miraba ta toz os cabos pero no reconoixeba en qué puesto yera.



De novas, **Belianet** perzibíu una uloreta que feba sapia a minchar. Asinas que l'onset aproveitó que as portas d'a cambioneta yeran ubiertas e miró e rechiró dica trobar más cosas ta minchar. En ixas, sin que o nuestro protagonista i parase cuenta, dos personas s'amanón enta o veíclo e lo descubríon bien coflato minchando toz os lamins que bi'n eba. Ixos señors, un matrimonio sesenteno, resultón estar os dueños d'a cambioneta e veniban de bien lueñes, de Canadá. Se conoix que yeran biólogos avezatos a veyer onsos en o suyo país, encara que ya no en i quedaba tantos como antes más. **Belianet** les esplanicó que él yera un onso pardo pirinenco que viviba en as montañas e que, por un regular, siempre gosaba tener prou fambre e suenio. Por ixo eba feito buen forato de tot o minchar





e tamién les contó que ixo lo prevocó o espanto que pilló en o carnaval en veyer-se encadenato. Os señors lo entendión e lo perdonón.

O matrimonio relató a **Belianet** cómo qeran arribatos en o nuestro país e cómo dende fa días qeran conoixendo a nuestra fauna e flora tan rica, pero tamién que s'eban estrafollato baixando de Bielsa mirando de trobar Ordesa. Bien de camín, fizon pacha toz tres e naixió una amistanza que aplegaba intereses e sentimientos comuns. Contino **Belianet** les ufrió a posibilitat de conoixer as maravillas d'o país porque conoixeba toz os racons e foratos d'a montaña e, a truca, os dos viellez le ufrión a **Belianet** a posibilitat d'ir ta Canadá e conoixer asinas a otros onsos como él. Libres en o suyo paisache, sin domador...

© De o texto: Alberto Gracia Trell
© De as ilustrazions: Chema Lera
Diseño y maquetazión: Publicomp
Edita: Aladrada Ediciones (aladrada@gmail.com)
Colabora: Departamento d'Educazi3n, Cultura y
Esporte de o Gubierno de Aragón

